



## Komunikado

19 di òktober 2022

### **Cft: “Kònròl di gastu ta keda krusial”**

**Willemstad – Ekonomia di Kòrsou a rekuperá bon den e promé mitar aña di 2022. Kòrsou a redusí e défisit presupuestario den 2022 i ta presentá un presupuesto balansá den 2023. E rekuperashon di finansa públiko sinembargo ta frágil i bou di preshon ya ku kresementu ekonómiko ta menguando. Diferente inseguridat ekonómiko nobo i ekonomisashon i reforma ku ta keda atras den salubridat i seguro sosial ta forma riesgo riba término largu pa finansa públiko. Un bahada struktural di gastunan den sektor públiko, salubridat i seguro sosial, den kombinashon ku un maneho presupuestario estrikto, disiplina presupuestario i e reformanan den e Pakete Nashonal (Landspakket) ta esensial pa fortifiká rekuperashon di finansa públiko. Kolegio di supervishon finansiero di Kòrsou i Sint Maarten (Cft) a insistí riba e puntonan aki den e kombersashonnan resiente ku el a tene ku Gobièrnu di Kòrsou.**

Na komienso di 2022 ekonomia di Kòrsou a rekuperá fuertemente di e krisis di COVID-19. Banko Sentral di Kòrsou i Sint Maarten a kalkulá un kresementu ekonómiko real di 5,5 porshento den 2022. Entre otro e rekuperashon fuerte aki a yuda Kòrsou redusí e défisit presupuestario den 2022. Sinembargo un kombinashon di inflashon haltu, subida di interes i mas inseguridat ekonómiko komo konsekuensia di e guerra na Ukraina, a redusí e kresementu ekonómiko mundialmente. Influenshá pa e desaroyo kontrali aki e kresementu ekonómiko real di Kòrsou lo baha bèk na 2,9 porshento den 2023.

Durante vários aña ekonomia a krimp i e debe nashonal a subi, loke a pone ku e situashon di finansa públiko a deteriorá bastante. E debe nashonal di Kòrsou aktualmente ta suma ANG 4,3 miar, o sea 87 porshento di e produkto interno bruto di e pais. Kòrsou ta pará dilanti di e reto grandi di trese e debe nashonal bèk na un nivel aseptabel. Un redukshon struktural di e gastunan di e sektor públiko, salubridat i seguridat sosial den kombinashon ku un maneho presupuestario estrikto, disiplina presupuestario rígidu i e reformanan di e Pakete Nashonal (Landspakket) ta nesario pa logra esaki. Tambe Kòrsou lo benefisiá si por laga e mehoranan supstansial di kobransas di impuesto bira mehoranan struktural.

#### **Presupuesto 2023 i despues**

Gobièrnu di Kòrsou resientemente a entregá e proyekto di presupuesto 2023 na Parlamento. Ei den Kòrsou ta presentá presupuestonan balansá pa añanan 2023 i 2024 i surplusnan entrante aña 2025. Cft a insistí serka Kòrsou pa for di aña 2023 realisá surplus den su presupuesto i uza e surplusnan pa pago parsial di su debe nashonal. For di aña 2021 Kòrsou tin bon resultado ku e proyekto pa mehorá pago di impuesto (compliance) i optimalisashon di ehekushon di impuesto. Di e otro banda, te ainda no a tuma e medidanan struktural pa baha gastu. E presupuesto di Kòrsou ta kontené vários riesgo ku lo por hasi e mehora di e finansa públiko nihil, den kaso ku no tene esakinan sufisientemente bou di kònròl. Den e kuadro aki Cft a ekspresá su preokupashon tokante di e reformanan i ekonomisashon den salubridat i seguridat sosial ku ta kedando atras, e gastunan di personal ku ta kresiendo i e uso ekstenso di e sekshon di produkto i servisio riba e presupuesto. Ademas Kòrsou lo mester pone mas spit tras di medidanan pa subi entrada, manera introdukshon di license fee pa esnan ku ta ofresé weganan di gambling.



### **Kuido i seguridat sosial**

Reforma i ekonomisashon den salubridat i seguridat sosial ta nesesario pa garantisá sostenibilidadat di e sistema sosial pa e futuro generashonnan tambe. Ya pa basta tempu Cft ta ekspresá su preokupashon pa e hecho ku no ta tuma e medidanan nesesario i tambe pa e riesgonan ku esakinan ta representá pa presupuesto di e pais. Kòrsou ta paga un kontribushon anual di ANG 306 mio na e fondonan sosial i ademas di esaki e pais ta obligá na kompensá défisitnan di e fondo ku ta fluktuá (schommelfonds). Cft ta enfatisá ku riba término kòrtiku Kòrsou lo mester tuma medida pa prevení ku lo bai tin défisit den e schommelfonds. Kòrsou mester hasi uso óptimo di e oportunidatnan ku e Landspakket ta brinda pa den un forma duradero reformá e sistema di seguridat sosial riba término largu.

Cft a ekspresá tambe eksplísitamente su preokupashon tokante di e situashon finansiero di Curaçao Medical Center (CMC). E pèrdidanan persistente ta afektá continuidad operashonal di e kuido di e hòspital i tambe ta pone ku no por pone traha un reserva pa mantenshon nesesario na e edificio di e hòspital i pa reemplasá aparatonan médiko. Pa e motibu aki Cft ta urgi Gobièrnu di Kòrsou pa sali for di e impase i pone atenshon na e riesgonan di e situashon finansiero prekario di CMC den e presupuesto i kaminda ta nesesario, bini ku kobertura pa nan.

Cft a bishitá Kòrsou entre 17 te ku 19 di òktober 2022 i a hiba kòmbersashon ku Gobernadó, Minister di Finansa, Minister di Maneho di Gobernashon, Planifikashon i Servisio Públiko, Minister di Asuntunan General, Komishon Nashonal di Reforma, Konseho di Minister i e Komishon Finansiero di Parlamento. Cft a papia tambe ku direktiva di Vereniging Bedrijfsleven Curaçao (VBC), Stichting Overheidsaccountantsbureau (SOAB), gerensia di Banko Sentral di Kòrsou i Sint Maarten (CBCS), Outoridat di Kuido di Kòrsou (den proseso pa keda establese) i gerensia di Banko di Seguro Sosial (SVB).

[Fin di komunikado]

**Foto:**

Sharson Smith

**Teksto pa foto:**

Cft ta ekspresá su preokupashon tokante di reformanan i ekonomisashon den salubridat i seguro sosial ku ta kedando atras, kresementu di gastunan di personal i e uso ekstenso di produkto i servisio.

**Nota pa redakshon – no pa publikashon**

Kontakto na Cft:

Sekretariado Kolegianan di supervishon finansiero

Telefòn +5999 461-9081 / +5999 461-9082 / +5999 461-9084

Email info@cft.cw

Website [www.cft.cw](http://www.cft.cw)

Persona di kontakto pa prensa:

Jefka Alberto

Telefòn +5999 512-6861